

湘綺樓全集

湘綺樓文集卷第七

長沙湘潭王闓運字壬父撰

墓志銘

采芬女子墓誌銘

出郊而望但見紫玉之煙舞鶴還來俱入泉臺之鏡春
寒南隴鷓鴣始啼水下西州伯勞空去留野棠于荒寺
拾落葉于崑山其中有麗人焉其人也生于南海命曰
東娥雪肌曰楊柳爲腰玉色曰芙蓉佗骨身嬌阿那非
關石尉之珠頰薄分明略比蕭宮之醉蛾眉勝于粉黛
秀質弱于羅紈鄰宋玉而三歲無窺問羅敷而長季未

滿喜教鸚鵡似有怨而無情常瞋蛺蝶每春輕而豔重
至于青瑤窗裏明月初回白玉房
壽垂楊自見桂旗習
禮花紙能書懣淺媚已題箋倚宿妝而弄蘭玉臺清製
非惟芍藥之文太甲仙函卽擅靈飛之字微吟風引薄
蔡女之言才妙解天成過宓妃之受教是目冬閨寶押
作頌方閒秋期銀漢臨波微睇略修詞于彤管時寫韻
于青幃可昇近比芬椒遠吟班扇乃以迹珍私篆詩付
餘焚秘雕華之逸札自託蠶絲問縹帙于當今不分麟
閣碧玉瓜季之及季蘭蘋澗之時生本無雙何論天壤
名居第一自成殊邈鬢影彈琴笑文君之自耦樓中吹

笛無弄玉之俱仙倚袂如思橫波已淚加以曉鷺驚露
宵雁來霜眉長而易鬢髮多而難掠青羅薦冷寧待風
妃紫綺襦分初無鳳翼芳辰三五方洛陽而自嬌闌干
十二弔姮娥而微歎況復朔冰蕙減秋雨桐清緩箭宵
遙芳衾暮卷海棠零雨但有春寒桃花映日已成朝病
酥融錦幌瘦掩金泥瑤瑤情持絕飲靈臺之露金盤罷
進詎學麻姑之脯雖復五銖衣弱不稱慵肩片玉甌擎
尙勞纖手然而樹說蠲疾願忘阿母之息夢草空裏豈
冀夫人之寵坐依屏幃無合德之回身容分圖畫異吳
妃之不飾華宮宛轉洞室優游鍼佩朝攜香囊莫解持

裾有望難留少女之風入峽看雲遙有美人之氣墜衣
未畢不復成妝將鏡非遲何曾得影繭牽情而冀續灰
落夢而徒驚執手卷然斂容而逝嗚呼某幼依若菀得
近荃珠江左雙名慙是小喬之姊劉家清族終傳三妹
之才入室思君臨牀憶起初七下九焉念共戲之時玉
檻瑤軒盡是同凭之地琴聲未絕素軫旋塵繡袂將成
珠襦遽慟雖事猶昨日人已千秋空幃流影而靈鵲自
驚寒門飛雪而哀鴻不返湘蘿罷月墳草易秋過蔓域
而斐回問芳徽之未沫呼名嗚嗚執筆荻蘭寫恨無窮
所懷何極祇以薰薷三過猶讓徐香寶樹連枝深慙韞

絮牀支翡翠空題瘦粉之碑泣冷瓊瑰化作相思之子
嗟夫零鈿悼以香銘其詞曰

倚與淑女四姓之良金香佩德玉節和璫爰自綺齡從
乎遠道寒渚楫雙室門緹早幼已明詩永言式則詞必
久慮容無愠色長爲妍質十七之季雲將比黛霜則陵
蘭雖以弱體曾無情顏膠云脈續香虛魂返妙想聞樂
雙成促往仙芝枉服叢蕙何依煙寒宋宋月望離離姊
姑悼哀侍奴知涕匪曰私親感于嘉美東城之間藏以
芳土鶴還孤月蟻嘯并兩白日照地無聲有光蜀鵲無
望楚些何傷悠哉美人茲恨在昔淒已干春視此片石

皇朝追贈布政使銜子諡忠壯記名湖南道員鄱陽黃

君墓志銘

君諱清熙字子春鄱陽豐田村人也秉淵溪之精穆峻
厲之容童而居貧躬耕販以給養者近二十季篤學罔
廢季三十由丁未進士分發湖南卽用知縣委署會同
乃布顯政激清源誅奸宄養小民野無橫征之戇吏無
簿書之煩行縣徒步止舍逆旅僕從不堪其勞君不勝
其逸及移署綏甯增修前功儉以惠下直以抗上詞色
嚴毅常若有怒時俗驚怪乃稱疾守靜其時 皇澤久
屯旛旄有翩幙府惟干城腹心之材軍謀是咨君用是

扁舟孤征上下于江漢物見同異一夜潛發不皇齋糧
便貨僮鬻馬而歸今四川總督駱公方撫湖南知君嶽
奇徑下檄委署湘鄉君尙在告寮宋竦望訝其非例奸
猾之徒聞名而先遜者蓋數十人到五月遭父喪去官
既奉母遷長沙要經領軍擊賊寶慶奏功以知府用并
賞花翎又率所部復空章桂陽二城奏保道員遂奏
君從征四川以先啟行聞寇犯定遠偏師馳戰凶徒數
萬望風弃甲奔走蒲伏者百里相望或喙息于巖壑輕
騎突進俄出其前乘馬陷淖逃寇呼嘯曾未返旆遂殞
命于二郎場年四十有五其日則咸豐十一季五月壬

文集
實也尸爲賊焚得其首合餘體而斂逾日又得左手別
置蘇焉嗚呼君負不世之氣臨事無讓根而不撓終一
出而折其命矣夫

皇帝惜忠節厚飾終追贈布政使銜予諡曰忠壯命采
功狀宣史館立傳錄其嗣世襲騎都尉同治元年三月
丁亥葬君于長沙大賢都之原戊山辰向兼乾巽宜也
夫人同縣李氏立君弟之子曰發卿爲後及女子子五
人妾胡氏並銜恤在疚怨乎百身念幽晦之永闕攷落
落之景行威惠存乎遺思壯節傳于無窮用儀古式刊
石作銘銘曰

於顯黃甫稟靈昌緒有淵其文厲節在古不卑小官眾
亦莫侮論不苟合獨斷規榘仍用貞固作侯心膺爰初
臨民禁暴綏毗猾吏負甄望風披冒不撓于上志气剛
強無弱矜寡男女順常疏食飲水百里清明

皇師西征亦奮其功容色泯泯致果于戎歟彼飛隼如
霆如風有進無退其道乃窮伊勇昭孝天休允終考宅
湘濱以答勤民我皇寵終司使顯尊命不可贖俾後
作神于我黃甫運屈气申幽讚烈光永貞不泯

鄧太夫人鍾氏墓志銘

夫家道之隆興自閭闔其有受祉蕃變秩秩綽綽愧飭

雖華惟率孝禮及身之祚延于百齡者則僕釐介福必
于賢母鄧夫人鍾氏潮州通判封荃功將軍荃岡鍾君
諱某之第三女也毓德承靈韜仁習度容儀豐頤夔耳
及肩初在葛覃啣啣遠聞荃功君靡國不到詎鍾燕譽
以同州鄧公孝友餘慶流蔭宐永請見諸子將合二好
于時贈通奉府君諱友煊方在穉齒相有厚福卽許嫁
焉季十三贈君失怙姑氏提攜孤子藐焉單窶以衰門
減禮將欲早迎父母難之爰詢女志夫人對曰父命于
鄧固願助姑服勞承歡其敢辭幼荃功君喜曰能明大
義吾無汝慰粵于乾隆五十二年令月來歸于鄧君姑

夏太夫人勤節苦貞躬踐約素計口而炊比于下農井
臼之任夫人是勉父或賜之受以先獻衣服飲食無私
貨畜宛若之間肅肅雍雍故以介婦之行受傳政之重
承祭祀供糞蘇于鄧室蓋七十有八年綜其徽音繁實
巨孝當姑老多疾安其扶侍夙夜牀下未嘗俟召先意
輒知姑忘其病方產元女而姑疾轉危爾乃以孝斷慈
呱呱勿子遠同郭巨事親之誠下抑姜龐溺子之哀道
通神明福祿大來姑病將革執手謝曰婦善事我勞苦
勤矣吾無以遺汝願從此以往衣文繡食甘珍子孝孫順
以至于百季盛矣哉至矣哉用能膺受縣祉景命有僕

子仁蒞歷州縣府道三司數十城之祿仁壽仁達亦有
品秩印綬之封爰及慈孫文明煒煌一道二府貂珠有
華五男二女孫曾數十素業廣昌童婢百餘房室土田
爲州大門 皇封三錫夫人敬受食天之祿又四十載
旣近期頤神明不衰季九十一以同治三季冬月日薨
于里第惟夫人以孝爲本以慈爲用初在鄉里損己濟
貧卹宗睦嫻黽勉有無從子在官訓以慈惠尤勤民災
數爲大施迄于暮季力豐德隆三因五鄰罔不周逮至
其柔敬以事夫仁嚴以訓子搏節以明禮溫和以養德
老而愈莊貴而彌儉凡彤管之所紀蓋難得而縷焉通

奉君之卒先于夫人二十有五季既葬歷久孤子仁塋
以合葬緣于自周幽宅宜于奠安遠惟古制別考靈域
驅筮既從遂舉封樹之禮同治四季春月日葬夫人于
某原榮哀終備大德允睹既別起北隴宜有議銘乃刻
幽石其詞曰

晉在鍾媛爲晉禮宗輝暎永矣賢母嗣輓幼孀于鄧思
媚君姑以孝以敬以大其家勛相夫子衿纓是戒天祿
中積孤其盜賴穆穆夫人訓迪底成烈烈中子顯爲名
卿福流列邦祿萃于躬富壽康強子孫其逢雖休勿休
增益蕃昌耄貴猶勤比于敬姜天寵既赫姻黨瞻儀百

歲之內爲楚女師孝事終矣五福亦備奠靈高原松柏
翳翳追徽記音以詔幽泉承慶百代藏德億季

常文節妾蔣氏墓志銘

太宐人蔣氏父名曰光其先澧州人也北渚芳蘭秋水
夫人之國秣陵桂樹仙源小妹之家未發南都從游東
冶衡陽常文節公輶車度領畫省熏衣但寫荔支方求
荐菜以道充庚子曰歸官舍夫其婉約令嫻承歡敬訓
女君哀其窈窕師氏識其澣衣生二子三女而有菴昌
之難文節授命夫人殉焉桓宣城買德之郎將歸羊肆
劉太尉晉陽之婢暗泣虬須太宐人涂碧毀容赴丹明

節廣女之貞心愈烈秦休之內恩無方竟護諸孤生還
故里廿季之內家道復隆東閣之門再開百尺之桐方
从季卅有八同治九年正月乙亥卒于里第所生子鼎
先以詹事府主簿請于所司有誥封爲太宜人適子豫
追念艱危躬卜幽宅以其季月日葬于挖北禮也長子
豐扣心思德齧指銜哀及息女左氏孫氏楊氏竝憐柔
儀增傷苦節胡顛之孤衷靡寄金盈之長結如何霜露
淒然風焱未已豈直汝南李氏克配周侯潯陽孝廉始
知陶母銘曰

磨金愈皎焚玉知貞存孤濟難厲節念生桓禽飛矣黃

鶴悲鳴宋寥元夜蕭瑟松聲

張祖同妻周氏墓志

孺人姓周氏諱孟儀長沙人也父某某官績之通禮蕢魚之教方成湘浦傳芳荃葯之門始大東方月出纏幣五雙南國桃妖華季十九同縣張君祖同名父之子弱冠多才薇蕨相望棗梨斯贊咎嫌承女未稱新妝今訝荀妻惟傳絕豔孺人逡巡四德婉孌雙心畫蛾眉而恆待明星御鹿車而無妨纖手琴書之暇箴管多閒下帷而問字頻襄勸學而鳴機更軋至于青軒月始朱戶春餘鳥多長樂之聲花有忘恩之色秦嘉暫別已怨皇靈

曰季相逢乃傳賓敬既燕且饗十有一季而以淑慎自持溫恭有度姜家堂上喜孝婦之湘魚石氏牀前代光動而滌器顯章之嫁惟奉于歡容趙母之終自投于婦手愉瘳應于禮典宛若憶其怡柔代室未幾當閨俄掩倚桂樹于姮娥惟餘藥曰采靈薇于驚女但有回川同治九年十有一月壬寅感疾告終號佛而逝春秋三十有二王婉羅之雲樓不偕君寶楊容華之長簞留與安仁青山有埋玉之邱白蘋非張幃之地粵以十一季月日葬于縣北文衝之原夜壑有遷朝雲無所追其高致殉以兮石刻茗華之二字藍田之舊壁難尋賤薜荔之

一篇楚國之春蘭不絕

贈太子太保兵部尚書世襲一等輕車都尉剛直彭公

墓志銘

公諱玉麟字雪琴衡陽人查江河隆彭氏也其先蓋明
之世官洪熙中有光祿大夫顯明來居成族遂爲著姓
祖啟象父諱鳴九並有名行詳于縣牒公承先德功位
煊隆行狀登于國史勛績紀于賜碑薄海周知固無述
矣爰起孤幼有志功名及履崇高超然富貴然其遭際
世所難堪始則升斗無資終則帷房悼影但恥于侏儻
一從豪宕吳音楚服炯然冰映其用兵也眾所疑議飄

然赴之其辭官也人所咨起倏然去之常患咯血乃維
縱酒孤行畸意寓之詩畫客或過其扁舟窺其虛榻蕭
寥獨且終身羈旅而已不知者羨其厚福其知者傷其
薄命由君子觀之可謂獨立不悲者也晚遭海氛起防
南越自謂尋其外所乃復動見扳纏因積悲勞加之瘴
毒重感末疾遂曰沈彌頻表請歸釋兵養病咸謂不起
猶強遊吳越光緒十六年三月甲子卒于湘東里第年
七十有五粵曰其季十有一月甲申葬于衡陽章木寺
之原始卜青烏得吉壤訪其山名正同公諱斯蓋天
啟滕室嶽配申神略取諧聲改曰餘慶坦禮也埋息地

下鬱鬱千季宐泐幽詞以畢深恨其銘曰

豕韋作伯斟雉師王一顯一隱何晦何明烈烈尚書婉
婉儒生始同公瑾舉酒磨兵旣奪小孤簫鼓和聲左右
揚曾江南底平雖驛圭組卒踐台衡爰四十季枕戈社
革軍民晏然還其枕席公獨羈孤蕭條老疾凡我同袍
莫同其戚積感終身浮名四域貴壽非我襟情自惜華
采終照運數俄遷晉時鼓角今日山川虎气騰雲龍劍
還淵長松蔭國美檟在原祁連賜冢佁僂負天華表干
歲玉樹重泉梁鴻可傷叔譽徒觀

皇贈侍郎賜祭葬光祿大夫貴州布政司使王君墓志

銘并序

君諱德榜字朗卿江華黃竹柴人其先廣東東莞王氏祖達敷始遷領北父諱燦養母謝氏三代均以君官二品立功特賞一品封咸豐初領外盜起蔓延永桂所在團練君兄吉昌最有名曾侍郎治兵衡州遣平甯遠道州土寇君季十六從兄跳盪巡撫駱公知其材及大援江西兵餉並匱率偏旅備資糧合曾部圍寇奉新昌吉追奔深入推鋒遽殞代領兄眾遂留江西從克瑞州豐城身被七創出境援浙收衢五縣時曾公引退軍政無綱君官五品例難獨將因用助餉議敘擢躋道員俾馳

高遠抗衡列將玉山衝要遂專防守危城屹屹寇來如
牆踐雪乘堙拒戰九日兵食俱困智勇沛然乃躬率帳
前夜焚寇壘寇帥李秀成卽曾公所憚也三戰三合卒
遞廣豐奏功賞花翎加按察使銜逮蘇杭竝陷曾左斂
軍唯倚鄱東以通餉餉羣盜洶洶志圖衢信孤軍屯距
經三百日六被長圍曾無蟻援寇竭其力我不告勞
詔賞勇號部從優敘而逋餉巨萬軍士散亾自劾免官
釋兵待罪浙撫左公方困龍游奏以自副軍竄未黔堅
城立破具奏復官留浙自後驂靳高蔣號爲三軍奔命
五季周旋閩越凡五得奇捷十復名城再被重創功名

赫奭然左公咄嗟使人患其艱直急則優假緩則厭之
初調赴閩奏署按察使軍中受印季二十九既遷布政
復從援越左公自擅圖學習講方輿每按地圖遙授節
度嘉應合圍汪洋兼行突進圖相影響君與劉典竝
遏黃沙左公令屯江口周履形勢枯瘠偏荒路絕行人
乾灘从水改用便宜移屯北溪甫至而右屯已潰海洋
督其勁黨漫山驚隴龍旂數百衝鋒電掣君曰必从可
虜此易禽也張翼避之伏槍叢擊海洋踣从餘醜遽降
投兵殉跪俘四萬眾寇平加號達冲阿賞黃馬褂左公
知兵事已定恥絳灌無文諷令乞歸遂請終養及西師

大起復奏自隨總統甘南定遠諸軍受降十萬眾賞頭品冠帶母病告歸終喪三季君孝性純至忠以移天幸值投間兩還侍養曾胡並有奪情之痛唯君無憾焉左公內召宿將竝從受命教練京營再督所部治涿及永定河隄 特詔勞勉而時將偃伯朝論右文舊日臺司屈于巧宦醕賢親王博求英莖獨惜其歸託之浙撫糜以差委旋議援交趾遣將十營且署廣西提督自誓外綏固辭新命客將崎嶇要荒狼狽掘關助戰大捷諒山廷議罷兵復從初服卽家拜貴州布政使自藩閩至是三十季矣岳牧之班邈無同輩黔撫潘公當君顯時叻

官州倅及將交替越次授印按察司君夷然自抑在僚如屬勤于職事必持大體婺川普安民苗私鬥按兵遣諭威信允孚然積苦兵間重創十數南征感障舊疹爾增光緒十有九季三月十二日卒官季五十有七巡撫崧蕃公問疾唯以嶷夷窺伺爲慮故奏稱平居衡論期于破敵勤清忠毅足爲砥柱有 詔優贈官子祭葬以明季某月某日歸葬零陵禮也君通籍卅季在官一考位隆祿嗇論者同悲軍獲之貲悉推贈學于永州勸建書院直輦萬金畿輔水災出祭租千金助振疆臣特奏坊表再旌豁落樸誠亮爲楨榦膚功易著抑志誰甄爰

刻幽珉將爲史補銘曰

鵬巖負海代鍾英挺管哀賜劍今功銘鼎琅琊世貴祥
覽雙名洄溪卜宅三世昌卿鎮惡童奇荀都早達舍之
則藏功而不伐羽林典午貴筑編丁人驚宿將自吒新
礪安不償勞脂不自潤沒視巖疆盱衡國壘龍淵始化
鼉柱忽移湘淮灰滅將相星馳巨寢偃然鏗鐘不號何
功何名孰眺孰笑青松覆壘大樹搖風永藎奇氣屈作
長虹

振威將軍張君墓志銘

君張氏諱紹堂字又堂合肥人也宅于江甯

皇二十季秋考終甲第長子錫珍先從淮軍典司軍械前一季病故其弟士珩代之奔喪歸葬時東夷有風塵之驚廷臣誼囂倉黃促戰指斥淮帥及其私親淮帥李鴻章君妻兄也器賞三甥均寄重役飛章告變誣爲邦灼遠勞名捕若且忝胡越士珩自瑩還詣上元對簿諸子遑遑莫敢營葬幾二季事乃白坐舅甥不嫌奪職淮軍聲名埽地矣君本謀興淮軍湖中興元從功臣也又與李密姻平江南四季引疾終養三十季未嘗出家門淮人督撫提鎮半天下執傾中外君無竿牘之問類先知有今日者而歸葬之日猶幾爲兒子累孤棺縣縣封

樹弗營古人所爲感喟于功名之會也自曾國藩避事而推淮軍訾淮軍者復推湘軍及夫朝鮮失援二京震驚湘淮軍竝無威使論者猥疑巨寇之平徒天幸耳冒刃陷陣今也則亾李名旣陸曾計亦乖一時之將相烏足榮乎恨是非不明辱及國家後世讀史莫識其所以成敗卽君雖超然善終而地下之憾將無窮也義軍之起本以自衛推鋒習勇久豔其利敗不任咎失城無罰故折而婁奮挫而不撓今乃越國縣軍動輒牽連敵兵未交已若潰亾韓白之將復何所用諸帥汰然怙其富執忘初窮勞而欲倖功不叛爲幸敗何可得而淮軍

坐食饋餉幾三十季有累卵之危無橫草之功知進不
退以至于此使稍思君告歸之義知閒居之樂解散部
曲豈遽終廢故論君行述非獨見淮湘之廢興卽天下
大計可指而見君十五學書二十學劍三十從軍四十
退閒凡在軍克城二十破壘陷陣功可紀者百數由監
生擢至記名提督得勇號翎枝又以子官封光祿大夫
其伐閱富貴皆非正志獨好儒術教諸子孫竝令從名
宿大師及君之卒兩子貢舉有文名長孫亦舉于鄉矣
淮人六七督撫未一歲而皆罷由是知早退者之善自
惜其名也君以甲午七月己亥卒年七十有六歸葬其

縣棗林岡旣紀功于豐碑爰具敘淮軍本末以昭智勇而采羅榮光之誄以爲之銘其詞曰

淮軍勃興始張靖達維公成之與湘比烈劉吳周潘皆
溪相結實定中原李乃建節爰初犄角驂靳俊豪始搏
寇吭復無爲巢中輔贛南偏師騰蹕徽鏖甯三階以
擢戈船三翼焱馳電驅江滬一曠會師于吳下縣十七
府二省一劇岩堅壘彼芬是櫛吳之初夷莽伏檠叢輯
我彫戶仡我崇嘯建康之廬軍市十五抑之歐之民復
其所竈丁弗飭撓通臯西負海十舍摧旄刈倪諸將遂
巡莫敢先發率士九百奮其斧戍功成不居幡然遂初

設其羽葆御其板輿難進易退古之亮節今也視人爭
翕翕熱我公高尚并世所希建康神皋獨鶴與飛子姓
英英總轡皇道母顧而嬰楹書庭誥自母之殂神亾質
在曾不終星亦歸東岱峩峩嚮霍湯湯淮淝將軍一衣
雲日無暉亂曰世之論人以成敗毋自敗名以爲世快
誰能逍遙外生之外薶茲幽詞作鏡千代

皇中憲大夫候官陳君墓志銘

君諱景純字安卿候官人也其先世居閩螺江蔚爲儒
族衣冠文學迭踐清華獨守一經有同素士父諱觀海
以嚴正訓迪延聲閩里君孝思純穆神情淵靜總角之

季研精六藝弱冠通虞氏易厭心名理不求聞達早喪
元妻遂高不娶慈親衰老樂于色養雖啜菽盡歡而瓢
飲屢空子琇瑩閱其勤斯謀治生業輒莞爾曰君子慕
道貧乎何患端居寂靜凡卅餘載族從姻友並爲盛門
財貨委積或託以釐理至其家計米鹽未嘗屑意也及
夫訓翼有成翰飛天路出典南選入掌西臺君布衣里
門無改雅度蕉葛升越不滓京塵光緒十四季琇瑩督
學河南當家官舍固請迎奉翻然命駕未及稔歲遽聞
弃養烏乎豈鴻鵠之舉倦于長風將使後學一瞻德範
故無嘲于牖下乎粵以十五年七月七日卒于開封學

院春秋六十有四明季月日歸葬本縣佛子山先公之
域禮也君廉介齔然而勇于周急淡于物欲然嗜藏書
自閩之豫踰山越海琅編玉軸屬車相望乘輿蕭然襍
被而已彼都人士以爲美談若其植蓄志趨觀其子則
知之矣不有隱人何云名德貞而必曜乃作銘云其詞
曰

儒林邈矣乃盛于閩管闡星里今見高門高門有璋一
家四使竝佩瓊琚俱收杞梓有碩其儒被褐懷珠雪白
蘭芬素絲不渝敝廬誦易淵淵金石鶴鳴登夫尋聲者
迹誰謂弗彰河洛是儀仰之俄高哲人遠萎華不期久

賈馬斯茂師友寂寥山阿回首北郭幽宮松柏有巖古
賢沈冥慰我于潛

瞿學士妻吳氏墓志銘

夫人善化吳氏諱世慧字曰靜儀其先歛人也祖銑通
管商之學見重郡司父諱元浩以舉人試令河南知襄
城汝陽二縣母余氏同縣名族甲科相繼夫人幼而端
敏孝婉令儀季十二居父喪禮度稱情有若儒士淑問
階階鼓鐘千里十九歸同縣瞿君卽翰林侍講學士鴻
禧字子玖之元室也弱冠秀映賢能自退下帷守靜悠
然琴几閨房相對朗如連璧其家法肅穆君舅威嚴子

姓中外進退多愆夫人委佗觀志思媚君姑食貧燕爾
在勞而逸及相夫成學文通譽顯我黻子佩彣髮如雲
旣無汰容又無靳色可謂威儀棣棣德音不瑕者已季
二十有六奉姑就養于祥符學院爰初侍宦旅館金明
移柳依依天桃有灼朱幘翟茀望若仙來而華盛難居
葆真告謝深達元化豫剋終期光緒三季七月辛亥歸
卒于使院春秋廿七以夫官加級晉封夫人越以五季
九月歸葬本縣南鄉之原三族恫焉鄉朝唁歎同穴之
哀吁其永矣長子宣聰三歲而夭復產子女各一然皆
不育有福無祿命也如何然貞脆有常榮枯非我浮雲

雖逝流芳不沫追尋達旨式瘞幽銘其詞曰

周姬分子蕃變江南穆穆季蘭毓秀湘宮芬華必合媛
彥維雙有禮有容釐女釐士孝婉猗猗和于婢使未貴
而章圭璋特美朝榮旣曜幽思潛懷臨川感逝弔舊知
離宛其卷然如月之西遺悼在茲留恩委化薤此琳玉
以充厚夜竹筠松尖惠心無射

李編修妻郭夫人墓志銘

并序

夫人郭氏諱秉慧字曰智珠湘潭人也祖父汪璨鄆縣
令著德儒文爲時宗匠父諱如翰第進士早卒母石氏
端慈嫺禮夫人其長女也郭氏閨秀瓊暉玉映諸姑弟

四者嫁湘陰李文恭公尤擅才名竝傳詞筆夫人三歲
失父端敏夙成鄴君憐之託于愛女時姑子方有雋譽
學行斐然擇對邈焉務求嘉耦合茲兩美用結重昏季
十六于歸卽翰林編修贈榮祿大夫諱杭字梅生之元
嬪也問名之始三族咸歡玉鏡披帷謂迎仙匹文恭主
文嶺雒並以家隨琴瑟房中傳爲雅頌及媵佳婦復有
才名進拂青衿退吟紅藥美談衍于朝士淑問冠于湘
州而理美難當瓊華易謝君姑沈疾侍養徒勞心弱魂
孤恩深創鉅發聲歐血銜索枯形文恭譬喻多方孳親
靡奪嚶啼失母姪外從姑粵以道光十有九年正月甲

子卒于開封官舍季十有八其季七月歸葬善化藕塘之莊原西山卯向編修後卒考貞別葬宜也越五十一季嗣子輔燿重修封樹惟夫人懿孝明智鄉國有聞文恭旣命編修刊其遺集自爲製序其傳久矣而志石弗刊將待厥後今子女孫曾追遠不匱以閭運新撰縣牒備錄芳徽邦乘有徵幽讚是采礪予書丹乃爲銘焉其

詞曰

湘詩復古小芋先聲匪唯稟潤亦賴和鳴麗矣紅蓍溫恭相敬天桃春始季蘭禮盛本期百歲才逾二季璋祥未兆髡右俄捐豈福不洪維仁外孝高謝禮華冥心正

覺善終啟後久逝如新彷徨局隧誦習靈文三世旣昌
百聆方半式嗣芳型刻茲華琬

慈谿令秦君墓志銘

并序

君諱簧字鹿笙吳人也其先爲高郵名族康熙初有秦
文超以湘潭舉人授浦江令遂爲湘潭人焉文超文學
政事著名當代縣志有傳浙民有祠君卽其來孫也會
祖用易候選訓導高澹不仕祖之鉉嚴正正儒父諱昌
淬居貧厲行君少承祖訓孝弟慈良十歲能屬文博覽
藏書多所輯錄鬻鬻不給束脩供養道光末最有文名
軍興學廢閉門誦誦湘陰郭舍人舊客縣中欽君才品

及總東餉薦之自助于時湖南饋餉悉仰湘潭茶榷貨
征歲輸倍萬雖莞蘇翼若在鄉墾凡主本縣及岳澧鹽
稅十有六季院司貪重同治甲子鄉舉弟九三試益困
乃從例敘試用浙江知縣湖南貴州巡撫追敘前勞改
試用爲候補加同知銜季五十一以儒爲吏同官迂之
光緒六季譚尙書撫浙蘭谿請令遴君署事治以廉敬
訟平盜息強幹之吏見謂弗如遂移鄞令疲難稱最兼
瀕海通商賈胡畔渙會有商訟例屈法申夷君準理折
之鄞民謹服則以爲俗襍煩媮宜崇禮教旌孝女錢石
躬祠會稽民王孝子以章義痺惡姦猾知悒踊作傳張

本府察其廉明更左右之用是同適革心令若流水譚
公巡部頌聲洋洋君之發名自此始也十季補海甯令
十四季調補慈谿甯海民習械鬥定邦王氏至築堡拒
官君輕騎喻之礮衝馬首因發火槍立什凶渠旣除首
惡從容聽訟又捕斬劫賊凡五十餘人更爲健吏及涖
慈谿淫雨爲災請卹未頒饑民待哺自貸金粟人分銖
勺眾感其誠不待官帑明春大振因興工役百季水利
一歲報成旣積憊勞兼傷暑溽夙患溼寒致茲風沴決
事還寢遂病不治十六季六月甲子卒于官舍季六十
有七明季三月歸葬湘潭移風鄉洪鬱之原禮也惟君

三典劇縣脂膏不潤在鄞納餉司庫吏淨其數甯海政
孚逋賒悉登耗羨餘金一無所取顧坐前任負累萬金
身沒之後幾傾其產而所至民便所去民悲可謂月計
有餘古之良也然正尚所存不樂久宦三入浙闈一爲
同考墨黃校閱意復欣然諸子門人輒勉以學曰侍從
論思儒者職也才志殊途又可悲已銘曰

秦之遷湘如范徙陶雋矣浦江德音孔昭六世克紹復
惠東甌爰始青紵以文爲富兵不廢業貨不自稽翹乘
弗往公車是僦服政之季始軫其弭亦剛亦柔克究克
宣庶慈我民以贊化元胡不黃耆政成而老悽悽輿誦

翩翩江旄巷泣雖哀璞完爲寶仙山西秀是樂歸北有
子溫其顛瑱之球無日不顯我銘在幽

張安化妻錢氏墓志銘

并序

宜人錢氏嘉興人菽安吉士之女孫平湖張侍講之冢
婦也父諱元均詹事府主簿母王氏稟玉清門執笄文
苑年廿二歸張夫曰憲和字文心咸豐九季舉人湖南
安化命循吏儒林時有美譽宜人懸笄端淑奴靜有儀
以姪從姑入門改服持喪哀敬三族稱焉承事王姑克
恭家法四時之祭季蘭尸之逮冊四季簋饌豆膠雞鳴
佩玉乃七無聲也避寇凶扶持遷徙雖極顛沛係心如

在用受胡福家道。康然雅性寬柔，言無疾遽，從容鎮
物。璿璣中節，嘗避兵山舍，猝有劫徒，率眾突門，家人惶
駭，整衣出視，識有舊傭，懷以好音，命酬顧直，眾服其雅
量，紛然而退。夫罷常甯催科未集，猾吏獻計，將因籠斷
宜人，進曰：此德言也。正以臨之，彼刁何患其能持大體
如此，合君全名止足高澹，超然非有賢妻，豈無俗累。昔
稱萊霸諒不虛矣。旣嫻婦禮，服無靡麗，絕情燕好，息意
游觀。同治初，汎海南，奔夫嬰暑疾，旅僑江夏，誼絕親交，
邁危不驚，求醫懇悃，孤心隻影，貞感神人，僅及五旬，衣
帶穿敝，神傷質舛，蓋有其由。愛女中殂，故鄉暮返，升堂

尋迹殆若魂歸猶勉督夫子重興堂構鄰閭凋劫量情
振救其在官也獄囚冬繫親絮衣裯尤善綴箴如完裘
治慈聲所被非但嬰睨靜處勤行不汙豐約爰暨中壽
參髮如雲將謂遐齡奄從大化庚寅七夕家廟薦新前
夕登臺徘徊月露逮明將起忽眩于牀子婦扶承請從
姑息強衣庀具俄遂維箴以是日昏時卒季六十有五
巫醫靡措警歎猶聞二息號咷令君驚還不傷其外但
恨其速也於乎盡矣粵以其季月甲子葬于先塋千里
郵書百篇誅德闡運妻蔡夙奉貞槩縣檄之中請文述
美人生無外彤管何書既怛且悲乃爲銘曰

越錢光國彥媛清華嬰山詠玉重喜宦家淑人有姪令
德孔儀在貴實貧克遠紉羅昔學舫齋側聞孔釋括羽
瑩金情和性莫詩人所稱篋笥是恪躬躬匪懈洋洋所
託播遷誠憊游宦何甘言贊君子還守菽粘資老留愛
嘉湖弛擔何以卒歲夫耕婦蠶眷此勞生勉求無有得
喪非我不龔爲咎揮手浮雲冥心仙耦跂彼星明淒然
秋窈珠湖濶矣玉帶如環靈不好游豈念君山芳菲不
沫儀範無刊刻文蒼玖記思筠斑

常儀庵先生墓誌銘

並序

君諱豫字儀庵衡陽人也先代以老功世官與明終始

及君祖父父子甲科位登牧伯傳于國史君秉性端
疑弱不好弄進退有度其容不改服翫詩書靡樂紈絝
季十九自京師還應鄉舉與道州何紹基益陽胡林翼
並有美譽達于朝官州郡貪其高賢父老驚其季少遇
有通塞七舉弗升卅五始以異等充本縣選拔貢生再
遊九門居然老宿公卿側席同舍聳焉初登上第俄遭
覆落于時

文宗踐阼推恩大僚以父任例得寺曹始官爲光祿寺
大官署署正旋以助餉議敘爲部郎非其好也間二季
省覲江漢丁菴昌之戾昊天降割九地崩摧憾重舛輕

迺圖權濟泣血潛殯五喪並獲方在民舍凶酋奄至持
矛躍馬醜譟破門君隱伏芻薪之中矛中其履若有冥
佑寇瞑而行大軍入城 詔求忠後君扶服送喪間行
歸衡鄉兵方起侍郎曾公方困軍資君上先公奉銀及
卹賞費凡數千金以振其闕然以酷難屯蹇身家顛沛
絕階功名終于息患矣君行誼高騫慎言敏行然諾不
欺有同季路雖在閭巷夙宵家國創立團約大修山堡
工費鉅萬不請公錢密戒不虞尤深其慮姦民盟結輒
遣諜鉤未發已禽莠黨摧落又躬至南海咨訪夷情總
督勞公疑其求仕乃助資輸官議敘以道員候選君識

其意遠巡便歸當塗貴人莫見其面然天性樂善飢渴
人材喜聞勝己勤于引進意所不合怫然義形少精音
律晚習壬遁湖海術客亦常盈門自推外季早飭其備
卒前十日猶意氣岸然寢疾三日以同治九年九月己
丑卒季五十有六豪傑之士莫不震悼如何中季殲此
奇寶平世尙文而君弗達危時須材而君自闕鄉鄰蒙
祐而君弗留友朋杖信而今靡就以明季六月丁卯葬
于衡陽十二都石合町之岡是用薤文重泉瘞君之憾
鐫銘勳石紀君之惠

銘曰道山之麓巖阿寂兮志士過之行躅躅兮惟此楨

文集
翰遭摧傷兮臥于幽局望八荒兮古今之豪同一邱兮
君宐安兮山之幽兮

皇清誥授

榮祿大夫
振威將軍

故兵部侍郎都察院右副都御史

巡撫安徽兼提督奇齊葉勒特依巴圖魯唐公墓志

銘并序

公諱訓方字菽渠常甯人也先世自監利來遷世有英
賢曾祖侃縣學生員祖恂父諱棣林學行淵懿隱居求
志並贈一品階官公幼沈毅豐頤秀眉初受禮經服膺
襲王之學道光庚子鄉試充舉六絀于禮部習業京師
東脩求誨者文卷盈門義取仁施以周友急清泉唐生

安仁段生旅殯不歸舍車載柩徒步許鄭之郊賣衣供
費同時新甯江生以送喪顯名公之行人莫知也咸豐
初軍興太傅曾公貪其宏篤版領偏師攻寇蒲圻興國
蕲有功以名字號軍爲訓字營營官凡名戰二百收城
三十以教諭在軍六季累擢授湖北糧儲道有 詔解
軍赴官以勸助勤所部精兵聽擇將代領於是江淮帥
臣疏調自助者月有三四湖北巡撫胡公執奏留鎮連
擢按察布政使竝就鄂臺蒞之以宿威邦之以雅步屬
大帥左次老昌波蕩督府日開莫敢晨炊公單馬雙劍
手刃反虜出奇設疑民心大定

穆宗初元淮院內訌前帥因喪解官薦公爲安徽巡撫
督師臨淮固保肥渦孤軍飢疲躬食半菽煦喁遺黎鉏
仆元惡僅逾兩稔復覩太清然後招流亾給牛種將敷
富教之政而援軍媚于湘師浮誦擠公廷議依回 詔
還湖北署臬使旋守巡撫撚寇北侵亟遷直隸布政使
入對

兩宮 天言咨美俄治防河沼讓功于寮羣望歛焉藉
公事免官俾領防務其時羣盜北趨六幕並開主客相
躡寔賴和輯內外台衡咸謂宜再典旌鉞騁于康衢行
義之志因時舒卷解嚴告歸幡爾明農其縣有黌舍臨

乎雙蹲昔季所主講也歸數學筵仍若布衣鄉人來見亦忘其貴蓋其冲素淵曠夷險一途固非榮辱所能累已昊不愁遺遐莫忽終季六十有八光緒二季二月丁丑薨于里第粵以其季閏月丙子葬于縣西藍江里楓坪之原遺命省約殯葬振助貧寡自斂至啟錢穀所存濟者老幼數千費逾萬金傾縣祖贈道路舉哀以過喪往往失聲可謂在邦必達在家必達者矣公起家儒門膺祿孔厚妻子奉養裁比上農族姻師友無德不讐自少爲文章老猶撰述皆不尙華靡自行其素夫人同縣劉氏以事姑至孝院司表閭朝旨褒嘉表樹里門長

子鏡心道銜廣東候補知府次敏眞兵部車駕司主事
遷郎中次準經鹽運使銜湖北候補知府次敏正以蔭
爲光祿寺署正早卒鏡心等奉喪吡嘑靡所寄哀閭運
咎同艱難中參賓從悲公德隱于功實過其名乃刻琬
九京以昭幽夜其銘曰

峩峩白阜潭原之奧有曠有崇天作靈囿達人膺神文
丕深純亦第亦爵猶弗竟申林臥虎耽曳杖是甘優游
義林虞淵弭驂宰上之柏居貞是度悠悠漢淮民念斯
宅

蔡夫人墓志銘

并序

夫人蔡氏諱執生湘潭人也祖璜以義俠仁聲名聞州郡祖母嚴爲縣女宗父諱榮森初名曉源文高列校隱居不仕母高塘李氏奕葉名門早凋慈蔭夫人依侍祖母備嫻工德織紵組漿酒齊菹竝精絜華馨爲女士也程式季十八父友丁取忠方善閩運譚而媒之閩運少喜標置不樂土風未之許也他日丁復言蔡女高傲或勸勿媒閩運遽曰女中安得高者請願媾焉問名之夕夢通謁者紅錦金書唯緹字朗然旦得庚帖越二歲來歸故字以夢緹然舉止任情語音愴重又不樂也旬日泛問家事欲難以所諱應對敏約婉而有禮始敬異焉

自是三十八載凡大義所存世俗乖刺之事夫妻處置
不議而同遂專家政聲聞于遠既習禮容尤矜風格明
眸廣額參髮稠如姻家黃嘗大會族親滿堂黻佩或問
誰爲王嫂黃母笑曰劉婦萊妻一望識矣同時陳鄞縣
妻裴光祿妻張安化妻並有才德咸共推襟商北陳母
攸龍母衡陽程母耆媛母儀俱加欽愛訓約子女有過
嚴師幼無帛襦長無靡飾初嫁之歲躬不勝勞乃自習
勤遂能薪汲君姑篤疾夫適計偕暑竈寒庭親供藥餌
由此勞痼深纏筋絡每發垂舛遂以不瘳然自力起居
彌加圭絜徹衣之日尋無纖塵若其祭祀之致虔賓客

之報贈雞鳴佩玉我孔熯焉自以居貧恆嚴取受頃歲
絕食有致金求夫文者笑曰當作則與文可鬻耶已而
夫果卻之相視駭然母李病時留金從母約取息以嫁
女後不如約舅子欲質之謝曰齋裝有辦又彰先妣之
過慮吾不忍也斯可謂持大體有士行者已然性褊易
怒周防已甚樂于形役曾不自休生子女各四庶女有
六夙夜顧腹未嘗安寢菁華早竭重以三殤餘喘雖存
積損銷骨季五十有七光緒十六季九月己丑遽從奄
逝遺言卜葬欲近名都庶比孟鄰恥居關外粵以其季
十有二月丁酉葬于省城南郊赤岡坤茶園坡庚山甲

向宐也銘旌書姓題處士之妻石哀賢從夫人之贈
未能同穴幸不求文女蒙兒書以昭母教其銘曰

潭有三望仙女在西侯塘之蔡三世繩振繫我淑儷有
曜惟新旣教婦功亦聞詩禮括羽瑩金惠心閭悌婉如
清揚不遠伊邇姜生游學婦職姑炊割彼私爨坐駛芳
時椎髻偕隱華季已衰人之多辟歲如駒隙子獨息深
靡朝靡夕世短謀長形雙心隻感我頑惰相從枝柱有
聞于邦庶延其祚爰及中身幡然大去思樂都人衣服
從容卜宅近郊血爾幽宮桃竹便娟亦泛和風平生靜
謫披帷斯在窈窕山阿駢闐都會眾喧我寂陸沈千歲

皇清誥授中議大夫彭君墓志銘

君諱嘉玉字砥先善化人也父諱煥章縣學文生神情
俊朗不韞家事君少稟貞性浮筠秀達八歲能文英髦
避席驂駒不駛從游象桂寄食州縣屢警俗吏歸求府
舉太守駭其高文已置第一仍詢所自君傲然不對抑
參乙丙季卅有六甫入縣學其時已貫通六藝高步一
州及試鄉闈冊名誤嘉爲家藩使愧其詰辭遽塗其卷
君之文采遂歎鳳兮曾太傅折節求賢始加敬禮高致
無匹弗與同舟太傅品之以博學抱璞然名亦稍起桂
陽別將請爲賓師旣承教戰乃形驕很色斯返駕困復

東游而巨寇已平踧茲驥足一攝泗州公田不給陳情
凶潤俾推商征贏利千金謂樂泌北晚有令子苗而不
秀復遭坎坷盡喪所藏少貧猶可老貧憊矣平生精研
三禮謙不著書曾太傅奏薦六人以君居首涂宗瀛弟
六俄躋總督富壽全歸君未補一官信其命也既有高
世之識又見舉于達人而門無車騎饗殮殆闕雖揭號
以悟眾眾豈悟乎天不憖遺以 皇十三年十一月壬
午卒季七十有二粵有孤孫于絨葬君省城南紅石之
原乙辛向以君之美不勝銘也著後所不知世所不信
詩云鼓鐘聲聞于外故殉石九幽以作知音銘曰

邈矣先生師乎吾師世無孔子誰章伯夷於乎

皇清誥授中議大夫衡陽程君墓志銘

君程氏諱學伊初名沅字春甫其先休甯人也舊爲著
姓通籍四方皇建之初員來水郡遂爲衡陽人焉父諱
世雄早卒以伯父無後仍嗣大宗所後妣何其母萬並
義節貞順見褒 朝廷君幼而端嶷富能好禮少有遠
度博友賢豪愛眾親仁後財先義孤松獨挺喬柯四蔭
鶴鳴于野千里應聲咸豐初義軍起衡英彥龍驤思樂
色養杜門守靜俄零桂波駭州居衝要上游轉餉非材
莫屬君時年廿有七守將交推遂總繇劇實主南道不

階帥府之命而有長城之重中興以來未嘗有也君既
勤于接納克厲眾志躬無重肉之膏廚有百人之饌其
弛舍周恤國人之所稱固不足爲君難矣九流總集權
衡不爽與物無忤而皆知所短惜夫其終于鄉間殆良
臣之器識也

穆宗三季叛卒掠湘安仁告陷知府張公急謀城守庫
儲空乏計無所設君建議借支權稅主者難之遂出私
券貸錢七百萬呼吸之頃防軍遂集事定乃奉司檄責
償大半守令失色咸以誘君二縣士民聞君集義八鄉
奔湊輦緡樂輸未及旬月悉彌所闕輸官之餘反贏百

萬君又倡議勸立學田所謂印卷公者也又按訪耆舊
佐成圖志文並之道識其大者事成書勞咸推君首謝
美讓善弗有其名前後主城防籌餼輿馬之費一無所
取朝晡家食而後從公深執謙德默然末座及臨疑難
義形于色始終兵事幾二十季東南督帥望風引重三
薦再敘以補用道員加三品銜拜命榮親志不從宦
然以布衣冠冕南州不亦偉乎事親蒸蒸五十而慕孝
終不遂委化先歿光緒七年閏月丙午卒季五十有二
烏乎人之云亾衡其瘁矣君徧識廣交會無遺議前歲
猥曰飛箝之書致君于訟雖昭昭自直明者恠焉反正

與常果爲妖崇於卒之日愚智同嗟巷哭野悲若喪良吏隱居達道其殆庶幾孤子穌祥摧傷先德以知君舊皆海內賢俊謂銘君者僉曰閩運是宜粵以其季十二月辛酉卜葬君于本縣北鄉江柏堰屈山之原命赴成都表茲幽懿乃作銘焉其詞曰

程有俠義名顯于湘越祀三百善積其慶繫維君子在隱而允洪聲茂實峨峨嶽陽於皇中興惟楚有材或公或侯風起雲飛君乃于于不出里閭納駟于庭英彥員歸零桂定矣不尸其功皇之命矣弗寵其榮載濁載清何所不容有文有莖安然其中爰初見推俗亦斯

之及得令名僉亦允之人則引之天則隕之雖曰隕之
幼實穎之誰謂百季季也非壽績建名立古爲不朽洋
洋德音巍巍予阜幽宮窅冥貞石可久

皇清例贈文林郎王君墓志銘

蔡毓春撰

君諱士璠字奐若湘潭人也風情嚴峻清貞不渝直節
足以敦古信行足以式俗幼學詩禮輟業爲賈雖曰貨
殖受命則貧富齡不融天道渺矣君卒之日則道光十
有七季春二月甲子日癸酉時也季四十五美行中涓
遂無所迹然宗族所稱鄉鄰不間未學而學性與道契
德隆命屈後論悼焉妻蔡氏吳縣人季二十來歸合儀

誕茂德音特章肅邕之華望塵知範敬戒之德率命無
違事君十二季而君卒奉姑竭敬視羞維馨遷鄰降訓
化道周洽慈肅是則節儉以先遭命不康嬰疾失祐季
五十有五以咸豐十季冬十有一月丙申日己亥時卒
其月辛亥祔君墓葬于湖南省城南門外二里牌之原
坤山艮向宜也銘曰

猗與府君清茂懿淵植行匪貲蹈能彌堅不隕不絀罔
厲罔偏庸行何矜潛德廓延豈曰造深寔受于天誕求
淑嬪德齊操壹端恭範梱絜清承肸居屯理泰思純政
宓遐矣百歲言遠其室元化冥杳芳猷簡睟君嗣之配

厥爲子姊明誼維姻比恩猶子哲萎追放容韜逃媿景
行伊何累德是紀託篆藏幽徵銘考履

陳永豫墓志銘

君諱永豫字建侯故閩人也康熙初有左都督陳鵬舉
以征臺灣功移官湖廣督龍陽墾田遂爲龍陽人焉君
祖嘉猷敦品勵行有聞于鄉私謚愷毅先生父諱德坤
富而好禮嘗置祖塋墓田不居其名曰追遠猶事生也
以孫官 贈通議大夫君秉性高澹公家獨學十有餘
季董生下帷無其劬也季二十有四府錄弟一取充縣
學生員同治元季鄉試副貢選寶慶府學訓導在官七

季以經術厲士品節隨學淺深而爲誘迪修葺學舍不
率公錢教政風行檄兼新甯學事郡土樂育方慕埏甄
值鄉邑凶徒惡直醜正從子舉發盜患且憎倉卒反圖
父子併命君愀然歎曰綱維弛矣烏用以門望取禍稱
病忝官挈家東下止于蘇昌依山築室獨寐寤宿思樂
澗阿自此息交不開世事考終卽葬實曰達生季六十
有一光緒八年九月某日卒于蘇昌之東山葬于宅旁
鯉林禮也君生平無疾言遠色輕財重禮能承父志舍
田贍族推宅立祠及至蘇昌倡積社穀平價輕息惠利
至今初自號介石晚稱東山詩文六卷學者重焉妻曾

氏早卒繼妻袁氏均以子官封淑人子昌曇以進士觀
政戶部改官道員次龍冒以副貢叙直隸知州次昌會
國子監生江介之遷門閭將大迫惟先德宐報之豐用
勒幽珉以旌淡退知幾之美其銘曰

漢壽有陳臨沅望姓余得友滄蘭芳玉映晚邁令弟穆
如清風恭聞先澤抗想儒宗儒宗伊何潛研自夙壯翼
不飛邵庠是淑目營四海心悸橫流褰裳涉江爰止爰
謀松菊閉門幽芳不改薄宦七季去來八載豈緊無戀
物役宐休旣在耆季乘雲而浮堂留金絲無驚石電天
極波騰長寢晏晏長江一曲東山萬雲可仕可隱式是

高芬

鄧氏大姊王娥芳墓志銘

妹滋撰

大姊諱無非字娥芳湘潭人也舉人父君之長女母同縣蔡氏並有淑聞姊高亮藐儔幼襲鋒穎參雲顛首出言有章九歲受篆泐于獨山莫先生跋扈婉通自竊筆藝盈尺之字尤爲世珍寫詩禮經公羊穀梁春秋經傳余疋篇能正俗字十二而九經畢誦兼諷楚詞賦頌歌詩十餘萬言讀史問命垂無爰斯柏譽始發積疑有啟予之益作叢蘓詞秋鐙引桂陽鑄鏃歌文采有偁織維組紉不習而利季十有七歸于茆岡鄧氏夫曰國璫父

輔綸字璿之當代詩人二父宿交式相好矣然君姑勤
救姊性矜疏及男裕之殤家庭歸咎束縕難請屈令別
居舅有憐焉俾還故里感滿自傷因之歐血而標格不
損美問仍流及奔姑喪善終依禮留母家持服三季夫
納二妾還能輯睦治彼綠絲舊疾有差文章道進作湘
軍兵執地形圖廿餘幅攷定山川上通禹貢未及卒業
重邁閔凶傷弟念親血疾增加慈父躬往省問因護還
湘霽雨橋船僅而後濟歸日臥病六旬弗興却藥絕飲
七日而卒危苦之厄泰然自如雖講道爰髻庶乎不惑
不思之君子已光緒八年五月辛丑終于長沙春秋廿

又九其季十月壬午歸葬茔岡先塋之次有二子二女
十季三殤孤女順孫斬焉爲後烏乎有才无遇生也若
浮旣从心于大冥悲聚骨于正北追善羨之莫聞臨殯
石以書幽其銘曰

蘭叢蕙糅必有先萎朗朗人兮玉映金磨早从仙游流
渚翔嬉翩其入塵習禮明詩如何高志敖敖頽頽舍曰
瘞之都梁在厓

皇授光祿大夫兵部尙書右都御史雲貴總督 贈太

子太保予謚荃慎劉公墓志銘

并序

公諱長佑字子默寶慶新甯金城里人也先世碑傳詳

矣公卽登仕府君之長子九歲就傅通論語五經十六
府試弟一入縣學弱冠游學省庠十有一季省覲暫歸
不過旬日同舍敬憚稱其和靜刻苦自勵未嘗驕吝布
衣粗食終身不改道光末充拔貢生旋值土寇發軔之
始遂兆兵端始領鄉軍實先羣帥楚湘義旅江曾盛烈
公倡之也廷試例用歸選重憇于是東南波蕩人無生
理公沈幾宏毅夙崇剛節同縣江公方以知兵見重深
相約結楚軍援桂公爲選鋒還郴永遂援洪皖陟陘
廬潁帥沒師燿脫于虎口爲湘特將曾軍大出盱南甌
脫瀏醴以東唯公城扞沛公百敗卒清三郡險阻艱難

備嘗之矣上慰州將下緝士心道充無詘眾無其比既而大捷邵陽躡寇靈川

文宗昭其忠良起家投廣西按察使署布政使踰月卽眞明季開府一歲三臺曾何足論十季宿將猶惜其淹雖位顯名高境無完土馬飲城濠烽照轅門庫無一金蜚鴻滿野扶創補敝劬勞三季遷督兩廣入領王圻羣盜蜂蛾大將蹀躞公以孤生領率羣貴乃部署離散申嚴軍法斬巨寇張玉懷驕將王恩第等于帷幕之下三輔父老始識軍容彝命五季坐無功策免假三品銜率所部回籍罷遣寇平敍防河勞列二品銜同治十季卽

家授廣東巡撫便道之官未踰月移廣西民吏歡迎若
奉慈母巨寇初平餘醜逃外部內民夷阻兵者十有八
皆咸稟威愛稽服就俘籠貢復通桑麻蕃茂司庫儲銀
乃贏百萬光緒元季冬遷雲貴總督過家上冢明季到
官懾彼南方久成域外將淫吏瘠唯賄是聞公廉正之
聲名于四海提督有饋因巡撫進焉奇琛溢目一一辨
名公笑曰皆不識也遂卻不受然性寬多容委權兩司
報銷行賕樞臣并黜公適入覲或議當以實陳恥于自
異卒牽吏譴及造膝溫室初無詰問誠孚主知吁其盛
矣在都引疾歸五季十三季六月辛亥薨于里第季七

十遺叔諸子無敢乞恩 特詔褒恤務從優厚 予諡

曰荃慎以表良臣天下翕然對揚休命于是孤子思詢
等以十四季四月葬我荃慎公子本縣東鄉木雞塘陽
之原西山卯趾名德莫贊又已十季叔子思謙乃謀羣
彥僉以爲功烈治狀所能稱者史冊正書具如家狀惟
公寬柔謹畏剛而有文宥密治心終身學易幼貧老貴
其容一也當世才德莫能與儔自非親服彝訓孰能名
之是用追懷景行勒銘幽宮感昔同袍彷彿音容其銘

曰

明有功貢以勸儒林匪靳公侯嘉此忠忱公起選士直

上千尋卅季金印韋布愔愔湘帥雲蒸奮其智勇曾德
胡功左勤彭黠各有廉名比公猶宥生不交利子無餘
寵天鑒孔昭民論誰譽實茆實慎悃福有餘滔滔南海
謨遠且訃大哉三州萬姓悲謳人之云亾弗扶廣夏獨
寐澗阿若宿車下業必有終時亦可謝將訪遺徽都梁
嘉夜

湘綺樓文集卷第七

桂陽陳兆璣奎校刊